

Sim Gyaez Mbanjsanggiuz

□Vangz Civeij/黄志伟

Dahraemxhoengz caen ndei,
Meiz(miz) fwen youh meiz(miz)
goj;
Mbanjsanggiuz mbouj yoq,
Yienghyiengh moq liuxcaez.

Daj bae Dava Yen Gungconh
Yangh Mbanjsanggiuz caijfungh
dauqma, gou lij ciengzciengz loq raen
gizde. Sanggiuz, lumj dieg sien nei,
bya sang, raemx saw, vunz gvai, hawj
vunz roxnyinh gig daegbied.

Mbatnduj yamq haeuj
Mbanjsanggiuz, gou lumjnaeuz bae
daengz aen seiqgyaiq moq ndeu.
Dahraemxhoengz lumj diuz seicouz
nei loegsausau, ngutngut ngeungeu,
lae gvaq henz Mbanjsanggiuz. Henz
dah rumz boqfifi, gij feihdauh raemx,
namh, nya haenx, unqswnh rub gvaq
gwnz gyaeuj gou daeuj, yaepseiz siu
gij fanznyap ndaw sim gou bae
liuxcaez.

Hai da yawj bae, gij bya
Mbanjsanggiuz goengq ing coh
goengq, mbaq dap coh mbaq, lumj
bang beixnuengx ceiq ndei ndeu,
maenhmaenh ndwn youq baihlaeng
mbanj. Bya miz goengq sang goengq
daemq, doxrangh mbouj goengq, moix
goengq bya cungj dwg gienh doxgaiq
yisuz gwnzmbwn saeqsim deugaek
baenz, hawj vunz lienziengj bae gyae.
Vangz lauxsae caeuq gou doengzdoh,
de beng giz cimbuh gou cam:
“Beixnuengx, mwngz yawj gij bya
Sanggiuz miz gijmaz daegbied ne?”

“Miz gijmaz daegbied? Gou yawj
mbouj ok, mwngz ganggangj hawj gou
dingq.” Gou doiq Vangz lauxsae naeuz.

Vangz lauxsae saengzswdswd
naeuz: “Mbanjsanggiuz dwg baihbaek
yiengq baihnanz, youq ndaw
sawdeihleix daeuj gangj, baihbaek gvi
‘raemx’, baihnanz gvi ‘feiz’,
yienghneix baijbouh, couhdwg ‘raemx
feiz doengzbangh’, yaem yiengz
bingzyaenx. Mwngz yawj baihswix
Sanggiuz, dwg aen singz Dava ceiq
sang, hoeng baihgvas ne, couh daemq
gvaq baihswix, neix dwg au baihswix
bouj baihgvas. Youq ndaw sawdeihleix
naeuz, baihswix dwg ‘cinghlungz’,

baihgvas dwg ‘bwzhuj’, bingzciengz
naeuz ‘cinghlungz goemq bwzhuj,
daihdaih ok vwnzvuj’, ndigah aen
mbanj neix wnggai miz daihbaj vunz
okrog dang guen dang hak.” Gou
riengz fwngz de ceij haenx yawj bae,
caen lumj Vangz lauxsae naeuz. Gij
bya deihseiq baenzlai daegbied,
lumjnaeuz Mbanjsanggiuz cangz miz
gij minghhoen coenzlaep daegbied,
hawj vunz miz di doeksaet.

Ndwensam, lij miz di nit lumj
seizdoeng, dou daenj buh na, hwnj saz
bae. Sam aen saz cug doxcoh, daj
Cingzyinzvanh hai haeuj Bizsuijvanh.
Youq gwnz dah, rumz nit ci haeuj naj,
aensaz bonghfifi, gyangdah sikhaek
miz raemxlangh, dou angq heuh
hwnjdaeuj, aensim maez youq gij
gingjsaek gyangdah neix. Vunzlai
caenhsim angq riu, angq dwk bya
ndaw dah haenx hix saet hwnjdaeuj.

“Raemx Dahraemxhoengz lae bae
haij, fwjgyaepbya ingj raemxlangh,
niemh gij aencingz dai mbouj lumz.
Sanggiuz dwg ranzmbanj gou,
Sambaujsanh ronghndwen hwnj, ciuq
youq aen van Cingzyinzvanh……”
Sawqmwh, miz soujgo rwenzrwd daj
ndaw saz cienz okdaeuj, hawj vunz
roxnyinh miz raemx raeujrub lae youq
gwnz ndang. Boux hujgeiq canghraiz
Veiz Yungzvwz byaij gyawj gou
naeuz: “Boux sij souj go neix dwg vunz
Mbanjsanggiuz Veizcungj, de youq
baihrog guhhong, goj miz dungxcaiz
lo.” Gangj liux, de au fwngz ceij
gvaqbae, naeuz: “Yawj! Bouxde
couhdwg Veizcungj.” Gou siujsim riri
byaij gvaqbae, caeuq Veizcungj
gaemfwngz. Cij raen de dwg boux vunz
sang, ndang maengh, bwnda de raez
youh fonx, naj seiqfueng, yawj
hwnjdaeuj yiemzsuk youh miz
simsingq. Doenggvaq caeuq de
gangjgoj, rox de miz aen caw ndiep
guk ndiep biengz gyaez ranz gyaez
mbanj ndeu.

Raemx bingz lumj gingq, aensaz
menhmenh biu bae, song haenzdah
bya heu faex loeg, lumj fuk veh ndeu
menhmenh hai daeuj. Veizcungj au
fwngz ceij haeuj goengqbya laeng



mbanj lwnh naeuz: “Neix dwg bya
Sambaujsanh.” Baez yaep da, gou
couh siengj daengz souj go de sij
haenx: “Sambaujsanh, ronghndwen
hwnj, ciuq youq Cingzyinzvanh……”

Veizcungj ciep roengzdaeuj caiq
naeuz:

Youq gig gyae gig gyae gaxgonq,
Gvangjsih Dava Yen Mbanjsanggiuz
cij dwg aen mbanj bingzciengz ndeu.
Vunz ndaw mbanj cij rox mbwn rongh
cix guhhong, mbwn laep cix bae ninz,
aeu song fwngz youq benq deihnamh
neix dwgrengz guhhong gvaq saedceij.
Yienznaeuz bouboux dwg vunz soh,
hoeng gwndaenj cungjdwg hoj lai.
Engggya boihseiz dwg, aen mbanj neix
mbatnduj yienzbonj mbouj miz saek ga
dah.

Miz bi ndeu, mbwnrengx cib lai
ndwen, fwn mbouj doek, ndit ndat
lumj yaek remj nei, ndaw reih dek
baenz hub gvangq, gohaeux hwnjdaeuj
couh dai lo. Vunzmbanj yaek dai iek,
dauqcawq bae ra raemx, hoeng bae ra
haujlai ngoenz cungj ra mbouj raen,
bouboux doeknaiq dauq ranz, naengh
youq bakdou simfanz najcaeuq.

Ndaw mbanj miz boux lwgmbauq
ndeu, mingzcoh heuh Daegyungj. De
raen vunzmbanj souh gij hoj neix, sim
in lumj cax gvej, de mbouj fug, boux
dog gag haeuj ndaw bya bae ra raemx,
aeu daeuj gouq gyoengq vunzmbanj.
Daegyungj boux dog gag haeuj
goengqbya coengzlaiz mbouj miz vunz
bae gvaq haenx, ngoenz hwnz byaij
mbouj dingz. De dawz fag cax ndeu,
doq raemj oen doq ra raemx. De mbouj
rox byaij geijlai nanz lo, roxnyinh hoz
youh hawq, bak youh ndangj, song din
naek lumj diet, cad couh laemx youq
ndaw ndoeng lo. Couh youq mwh de
baegmou mbouj baenz vunz, miz duz
loegvameiz deng sieng ndeu sawqmwh
youq ndaw nya ndonj okdaeuj, laemx
youq lajdin de. Daegyungj hojlien de,
mbouj yaemhywq saekdi couh sik geu
buh de, hawj duz loegvameiz duk
baksieng.

Siengj mbouj daengz duz
loegvameiz baksieng ngamq duk ndei,
de couh menhmenh ndwn hwnjdaeuj,
heuh mbaeumbaeu bae coh
Daegyungj, yienzhaeuh baenq ndang

couh ndonj haeuj ndaw ndoengfaex
bae, nanz mbouj nanz nyex gyaeuj
dauq laeng yawj Daegyungj,
lumjnaeuz hawj Daegyungj riengz de
bae nei. Daegyungj baez ngeix daengz,
roxnaeuz duz loegvameiz dwg
gwnzmbwn baij daeuj hawj de daiq
roen bae ra raemx? Yienghneix, de
cingsaenz hwnjdaeuj, maenhmaenh
riengz duz loegvameiz bae.

Ginggyaq cib rungh gouj bya,
daeuj daengz aen rungh cienzbouh
dwg dathau ndeu, duz loegvameiz au
gij gau de bae daemj coh dathau, faj
dathau menhmenh aj hai, cij raen
dathau baihdaw miz aen conghgamj
ndeu. Daegyungj miz di dungxcieg, de
menhmenh byaij haeuj ndaw gamj
bae. Haeuj daengz ndaw bae, de yawj-
raen gij gingjsaek ndaw gamj
dadaengx caez. Ndw gamj gij
mokfaenx haj saek mbin bae mbin
dauq, lumj dahsien gaem mbaw
beizsen diuq foux nei. Haeujbae ceiq
co, cij raen miz aen daizrin baij miz
sam gienh bauj, sam gienh bauj youq
ndaw gamj ronghsagsag. Duz
loegvameiz naeuz: “Youq baihswix geq
bae, gienh daih’ it dwg huznyawh;
gienh daihngaih dwg cawbauj; gienh
daihsam dwg dwngxaenz. Huznyawh
de rox gag ok raemx; cawbauj rox hawj
miuz haeux cug vaiq baenz lai;
dwngxaenz ndaej gyap bingh yw
bingh beksingq.

Daegyungj angq raixcaix, ngamq
dawz sam gienh bauj hwnjdaeuj,
conghgamj baihrog foemxfwg dieg
doengh bya saeng hwnjdaeuj. De
ganjgip buet okbae yawj, cij raen miz
duz lungz ndeu youh hung youh yak
heuj rig cau mbe boemz gvaqdaeuj,
de haenqdingding naeuz: “Gij bauj
neix dwg gij bauj gou, mwngz gamj
dawz bae, vaiqvaiq au hawj gou,
mboujni gou couh caij biengh aen
Mbanjsanggiuz mwngz.” Yienzlaiz,
duzlungz yak neix senq rox gij bauj
neix youq gizneix lo, itcig naemj gag
aeu, hoeng aenvih ndanggaeuq de guh
haujlai vaihsaeh, mbouj ndaej haeuj
conghgamj bae au gij bauj neix.
Mwhneix, de raen Daegyungj au
ndaej gij bauj haenx, de couh naemj
ciengj bae. (1)

